

# «La direcziun dal rapport d'energia è la gista»

Lunga debatta d'entrada per il rapport d'energia

■ **(anr/fa) Per avair ina survista da la situaziun da l'energia electrica en Grischun ha elavurà la regenza il rapport d'energia. Per ina part da la cumissiun resguarda quel rapport memia pauc las novas energias regenerablas.**

L'onn passà avevan inoltrà ils deputads *Karl Heiz* (pld, Puschlav) e *Vincent Augustin* (pcd, Cuira) mintgin in'incumbensa a la regenza: Quella è vegnida incumbensada da preschentar al parlament grischun co che la situaziun davart l'energia sa preschenta per il mument en Grischun e cun tge strategias ch'ins vul cuntanscher la finamira d'avair avunda energia en il chantun. La regenza ha elavurà il rapport davart la politica d'energia dal chantun Grischun, numnà rapport d'energia. Il rapport duai esser la basa per il cussegl grond per formular las strategias e las finamiras da la politica d'electricitad. L'accent principal metta il rapport sin l'utilisaziun da la forza idraulica e co ch'ins pudess la nizzegiar anc meglier.

■ **«Decider mesiras pir il proxim pass»**

Sco ch'il president da la cumissiun per ambient, traffic e ed energia *Simi Valär* (pld, Tavau) ha ditg a chaschun da la debatta d'entrada vegn producì 98 pertschient da l'energia en Grischun cun forza idraulica. «Ils fits d'aua s'amuntan a 107 milliuns francs l'onn», ha el ditg.

Perquai èsi tenor el era giustifitgà che questa forza idraulica è vegnida messa en il focus dal rapport d'energia. «La cumissiun sa baingea che las strategias èn formuladas da maniera averta, però quai era er l'intent da quest rapport», ha tratg endament Valär, «el duai mussar tge perspectives che existan, decider mesiras vegn fatg pir en in proxim pass.» Il commember da la cumissiun *Johannes Pfenniger* (ps, Tumleatg) ha manegià ch'il rapport saja ina bun'analisi dal status quo, «i manca però la voluntad per far il midament p. ex. cun sustegnair pli ferm las novas energias regenerablas.»

■ **Procurar ch'il chantun haja energia avunda**

*Monika Lorez-Meuli* (pbd, Valragn) ha manegià ch'ins duessia mantegnair en mintga cas ils dretgs d'aua tar las vischnancas. Er ella è da l'avis ch'ins duessia promover las novas energias regenerablas. A l'avis da *Markus Clavadetscher* (pld, Tumleatg) duai avair il provvedimento dal chantun cun energia l'emprima prioritad. Tant Clavadetscher sco er *Ernst Sax* (pcd, Rueun) han ludà la regenza, «la direcziun nua ch'ins vul ir è la gista.» Tut ils commembers da la cumissiun che han prendì il pled eran per entrar en materia e tractar il rapport d'energia. Tar la fin da redacziun nun era la debatta d'entrada anc terminada.